

Bosna i Hercegovina

Босна и Херцеговина



Sud Bosne i Hercegovine

Суд Босне и Херцеговине

---

**Predmet broj: S 1 2 K 022881 20 K**

**Datum objave: 5.1.2021. godine**

**Datum otpreme: 15.1.2021. godine**

---

**Vijeće u sastavu:**

**Sudija Biljana Ćuković, predsjednik vijeća**

**Sudija Izo Tankić, član vijeća**

**Sudija Stanko Blagić, član vijeća**

---

**Predmet Tužilaštva Bosne i Hercegovine  
Protiv**

**ALIŠIĆ EMIRA**

---

**PRVOSTEPENA PRESUDA**

---

**Tužilac Tužilaštva Bosne i Hercegovine: Biljana Golijanin**

**Branilac optuženog, advokat Bakir Hećimović**

**Broj: S 1 2 K 022881 20 K**  
**Sarajevo, 5.1.2021. godine**

## **U IME BOSNE I HERCEGOVINE!**

Sud Bosne i Hercegovine, u vijeću sastavljenom od sudija Biljane Ćuković, kao predsjednika vijeća, te sudija Ize Tankića i Stanka Blagića, kao članovi vijeća, uz učešće pravnog savjetnika Sanide Vahida-Ramić u svojstvu zapisničara, u krivičnom predmetu protiv optuženog Emira Ališića, zbog krivičnog djela Organiziranje terorističke grupe iz člana 202d. stav 2. u vezi sa stavom 1. Krivičnog zakona Bosne i Hercegovine (KZ BiH), u vezi sa krivičnim djelom Terorizam iz člana 201. KZ BiH, odlučujući po optužnici Tužilaštva Bosne i Hercegovine, broj: T20 0 KTT 0011872 16 od 12.5.2020. godine (potvrđena dana 15.5.2020. godine), nakon održanog ročišta za razmatranje sporazuma o priznanju krivnje i pretresa za izricanje krivičnopravne sankcije, u prisustvu tužioca Tužilaštva BiH, Golijanin Biljane, branioca optuženog advokata Hećimović Bakira i optuženog Ališić Emira, dana 5.1.2021. godine, donio je i javno objavio

## **P R E S U D U**

**Optuženi: ALIŠIĆ EMIR**, zvan i „Ebu Talha“, sin Vehbije i Safe Ališić, djevojački Deronja, rođen 23.09.1970.godine u Sanskom Mostu, sa prijavljenim prebivalištem na adresi ..., po zanimanju policajac, završio SSS, nezaposlen, oženjen, otac troje mladb.djece, lošeg imovnog stanja, služio vojsku JNA 1989/90. godine u Ohridu, nema čin rezervnog vojnog starješine, ne vodi se u vojnoj evidenciji, po narodnosti ..., državljanin ..., JMBG: ..., neosuđivan, nalazi se u pritvoru od 19.12.2019.godine po rješenju Suda BiH broj: S1 2 K 022881 16 Krn od 19.12.2019.godine,

## **K R I V J E**

**Što je:** Dana 13.12.2013. godine redovnim letom sa Međunarodnog aerodroma Sarajevo oputovao za grad Istanbul, Republika Turska, u namjeri pridruživanja terorističkim organizacijama „Jabhet al-Nusra“, „Al-Nusrah Front“ i „ISIL“, tzv. Islamske države na području Sirije i Iraka, a koje su na osnovu rezolucije R-1267 iz 1999. godine, te drugih vezanih rezolucija uključujući i Rezoluciju 2083 iz 2012. godine i Rezoluciju 1526 iz 2004. godine, dana 30.05.2013. godine, listirane kao terorističke grupe i organizacije od strane Vijeća sigurnosti Ujedinjenih nacija i koje su imale za cilj destabilizaciju i nasilnu izmjenu političkog i ustavnog poretka u Siriji, a čiji su pripadnici svakodnevnim oružanim akcijama i to napadima na stanovništvo, ubijanjima, protupravnim zatvaranjima, uzimanjem talaca i drugim radnjama namjeravali da prisile legitimne vlasti Sirije na izmjenu ustavnog poretka i političkog režima, a zatim, na tačno neutvrđen način, prešao granicu između Republike Turske i Sirije, nakon čega se pridružio i postao pripadnik paravojske formacije nepoznatog naziva kojom je

rukovodio Goran Pavlović, potom pripadnik paravojne formacije nepoznatog naziva kojom je rukovodio Ramo Pazara, te pripadnik paravojne formacije tzv. jedinice pod nazivom „Bejt Komandos“, a koje su sve bile pod okriljem ISIL-a, na području gradova Rakka i Haritan, čiji pripadnik je bio u vremenskom periodu od decembra 2013.godine do početka 2019.godine, kada se predao kurdsim snagama od strane kojih je na području Sirije bio zarobljen, nakon čega je dana 19.12.2019. godine deportovan u Bosnu i Hercegovinu te na graničnom prelazu Aerodrom Sarajevo lišen slobode od strane pripadnika Državne agencije za istrage i zaštitu,

**Dakle,** pridružio se i postao pripadnik terorističke grupe,

**Čime je,** počinio krivično djelo Organizovanje terorističke grupe iz člana 202d. stav 2. u vezi sa stavom 1., a sve u vezi sa krivičnim djelom Terorizam iz člana 201. KZ BiH

pa ga Suda na osnovu odredbe člana 202d. stav 2. u vezi sa stavom 1.KZ BiH, a sve u vezi sa članom 201 KZ BiH., uz primjenu članova 39, 40, 41, 42, 48, 49. stav 1. tačka b, i člana 50. stav 1. tačka b. KZ BiH

## **O S U Đ U J E**

### **NA KAZNU ZATVORA U TRAJANJU OD 2 (DVIJE) GODINE I 6 (ŠEST) MJESECI**

Na osnovu odredbe člana 56. KZ BiH, optuženom će se u izrečenu kaznu zatvora uračunati vrijeme koje je proveo u pritvoru, počev od 19.12.2019. godine, pa nadalje.

Na osnovu člana 188. stav 1. ZKP BiH, optuženi se obavezuje da nadoknadi troškove krivičnog postupka o čijoj visini će Sud odlučiti posebnim rješenjem po pribavljanju potrebnih podataka.

## **O b r a z l o ž e n j e**

Tužilaštvo BiH je dana 12.5.2020.godine podiglo optužnicu br.T20 0 KTT 0011872 16 protiv Ališić Emira zbog krivičnog djela Organiziranje terorističke grupe iz člana 202d. stav 2. u vezi sa stavom 1. KZ BiH, a sve u vezi sa krivičnim djelom Terorizam iz člana 201. KZ BiH.

Predmetna optužnica je od strane sudije za prethodno saslušanje potvrđena dana 15.5.2020. godine, a optuženi se na ročištu za izjašnjenje o krivici održanom dana

23.6.2020. godine izjasnio da nije kriv, nakon čega je predmet dostavljen sudećem vijeću radi zakazivanja i održavanja glavnog pretresa.

Dana 8.7.2020. godine otvoren je glavni pretres tokom kojeg je optužba izvela svoje dokaze, nakon čega je dana 29.12.2020. godine, Sudu je dostavljen sporazum o priznanju krivice zaključen između tužioca Tužilaštva BiH, Biljane Golijanin, optuženog Ališić Emira i njegovog branioca, advokata Hećimović Bakira, a kojim sporazumom optuženi u cjelosti priznaje krivicu za krivično djelo Organiziranje terorističke grupe iz člana 202d. stav 2. u vezi sa stavom 1. Krivičnog zakona Bosne i Hercegovine (KZ BiH), a sve u vezi sa krivičnim djelom Terorizam iz člana 201. KZ BiH, izvršeno na način opisan u optužnici. Sporazumom je predloženo da se optuženom za navedeno krivično djelo izrekne kazna zatvora u trajanju od 2 (dvije) godine i 6 (šest) mjeseci.

U skladu sa zaključenim sporazumom, optuženi se obavezuje na plaćanje troškova koji su proizašli iz ovog krivičnog postupka u iznosu koji utvrdi Sud, ukoliko Sud ne donese drugačiju odluku prema članu 188. ZKP BiH.

Dana 5.1.2021. godine, održano je ročište na kojem je razmotren predmetni sporazum. U skladu sa članom 231. stav 6. ZKP BiH, Sud je ispitao da li su ispunjeni svi uslovi propisani tačkama a) do e) navedene zakonske odredbe. Na održanom ročištu za razmatranje sporazuma o priznanju krivice, Sud je utvrdio da je optuženi zaključio sporazum dobrovoljno, svjesno i sa razumijevanjem, a nakon što je upoznat sa mogućim posljedicama, uključujući i posljedice vezane za troškove krivičnog postupka. Sud je takođe utvrdio da postoji dovoljno dokaza o krivici optuženog za predmetno krivično djelo, kao i da je optuženi razumio da se zaključenjem sporazuma odriče prava na dalje suđenje i da ne može izjaviti žalbu na krivičnopravnu sankciju koja će mu biti izrečena, nakon čega je donio rješenje kojim se prihvata sporazum o priznanju krivice zaključen između Tužilaštva BiH i optuženog i njegovog branioca.

Da je optuženi kriv za radnje koje čine obilježja krivičnog djela Organiziranje terorističke grupe iz člana 202d. stav 2. u vezi sa stavom 1. Krivičnog zakona Bosne i Hercegovine (KZ BiH), a sve u vezi sa krivičnim djelom Terorizam iz člana 201. KZ BiH, po ocjeni Suda, proizlazi ne samo iz njegovog priznanja, nego i iz dokaza izvedenih i uložениh od strane tužioca na koje optuženi nije imao prigovora. Naime, Sud se uvjerio da je broj i snaga dokaza opredijelila optuženog za pregovaranje i zaključivanje sporazuma, zbog čega je iz iznijetih razloga sporazum i prihvatio.

Cijeneći sve izvedene i uložene dokaze Tužilaštva BiH, Sud je utvrdio da iz istih proizilazi da je optuženi počinio krivično djelo koje mu se stavlja na teret, a radi se o sljedećim dokazima - iskazi svjedoka i vještaka: iskaz svjedokā K. I., P. N., D. V., Buljubašić Hasana, Ališić Mirzete, Ališić Faiza, P. Z., Ališić Faruka, Ališić Faika, Janček Maria, svjedoka – stručno lice Azinović Vlade, vještaka psihijatra prof. dr. Ćemalović Omera, vještaka daktiloskopske struke Plavčić Emire, svjedoka Ribić Sadžida i vještaka profesora Alajbegović Azre, dr medicine; materijalnim dokazima: T1. - Izvod iz prelazaka državne granice, Ministarstvo sigurnosti, Granična policija, broj : I-17-05-2-01/15-289 od 12.10.2016. godine, T2. - Zapisnik o uviđaju, Ministarstvo sigurnosti, Državna agencija za istrage i zaštitu, Regionalna kancelarija Banja Luka, broj: I-16-14/1-04-1-748/13 od 21.03.2019. godine, prilog CD sa audio-vizuelnim snimkom, T3. - Fotodokumentacija Zapisnika o uviđaju, Ministarstvo sigurnosti, Državna agencija za istrage i zaštitu,

Regionalna kancelarija Banja Luka, broj : I-16-14/1-04-1-748/13 od 21.03.2019. godine, T4. - Zapisnik o uviđaju, Ministarstvo sigurnosti, Državna agencija za istrage i zaštitu, Regionalna kancelarija Banja Luka, broj: I-16-14/1-04-1-748/13 od 10.03.2020.godine, prilog CD sa audio-vizuelnim snimkom, T5. - Fotodokumentacija, zapisnik o uviđaju broj:I-16-14/1-04-1-748/13 od 10.03.2020.godine, Ministarstvo sigurnosti, Državna agencija za istrage i zaštitu, Regionalni ured Banja Luka od 10.03.2020.godine, T6. - Naredba za daktiloskopsko vještačenje u cilju utvrđivanja identiteta, Tužilaštvo BiH broj T20 0 KTT 0011872 16 od 05.12.2019 godine, T7.- Nalaz i mišljenje daktiloskopskog vještačenja za Emira Ališića, Ministarstva unutrašnjih poslova, Uprava policije Sarajevo, broj:T-02/3-455/19 od 26.12.2019. godine, T8. - Foto-dokumentacija, Emir Ališić, utvrđivanje identiteta, Ministarstvo unutrašnjih poslova, Uprava policije Sarajevo, broj:T-02/3-455/19 od 23.12.2019.godine, T9. - Naredba za provođenje psihijatrijskog vještačenja Tužilaštvo BiH broj: T20 0 KTT 0011872 16 od 04.02.2020 godine, T 10. - Sudsko psihijatrijski nalaz i mišljenje – prim.dr Omer Čemalović, subspecijalista forenzičke psihijatrije, stalni sudski vještak iz neuropsihijatrije od 12.02.2020.godine, T 11. - Informacija Ministarstva pravde SAD-a broj #:188225724 od 03.09.2019.godine, putem Državne agencije za istrage i zaštitu broj: I-16-04-04-1-748-2768/13, T 12. - Prevod informacije Ministarstva pravde SAD-a broj #:188225724 od 03.09.2019.godine, putem Državne agencije za istrage i zaštitu broj: I-16-04-04-1-748-2768/13, T 13. - Naredba Tužilaštva BiH broj: T20 0 KTT 0011872 16 i T20 0 KTT 0013462 17 od 05.03.2020.godine, T 14. - Službena zabilješka, Ministarstvo sigurnosti, Državna agencija za istrage i zaštitu, Regionalna kancelarija Banja Luka broj: I-16-14/1-SZ-748-255/13 od 20.03.2019. godine, T 15. - Službena zabilješka, Ministarstvo sigurnosti, Državna agencija za istrage i zaštitu, Regionalna kancelarija Banja Luka, broj: I-16-14/1-SZ-748-53/13 od 27.01.2016. godine, u prilogu tri fotografije, T 16. - Službena zabilješka, Ministarstvo sigurnosti, Državna agencija za istrage i zaštitu, Regionalna kancelarija Banja Luka, broj: I-16-14/1-SZ-748-175/13 od 26.02.2016. godine, u prilogu dvije fotografije, T 17. - Službena zabilješka, Ministarstvo sigurnosti, Državna agencija za istrage i zaštitu, Regionalni ured Sarajevo broj:16-16/1-260/20 od 25.02.2020.godine, T 18.- Naredba za izradu ekspertne studije, Tužilaštvo BiH broj: T20 0 KTT 0010462 15, T20 0 KTT 0010333 15, T20 0 KTT 0011872 16, T20 0 KTT 0012366 16, T20 0 KTT 0018379 19, T20 0 KTT 0017656 19, T20 0 KTT 0018378 19 od 06.03.2020.godine, T 19 - Ekspertna studija, prof.sc. Vlado Azinović, Fakultet političkih nauka, Univerzitet u Sarajevu od 10.05.2020.godine, T 20. - Fco.Akt Ministarstva sigurnosti BiH broj: 08-1-04-2-2208-1/15 od 08.04.2015.godine sa aktima u prilogu vezanim uz proglašenje ISIL-a terorističkom organizacijom, Odlukom o provedbi restriktivnih mjera utvrđenih rezolucijama Vijeća bezbjednosti UN-a od 09.11.2011.godine,sa prilogom akata Vijeća sigurnosti UN-a broj S/2014/815, T 21. - Izvod iz kaznene evidencije na ime Emir Ališić, MUP Unsko-sanskog kantona Treća policijska uprava, Policijska stanica Sanski Most broj: 05-04/09-1-61/20/BB od 08.01.2020. godine, T 22. - Zapisnik o saslušanju svjedoka Sadžid Ribić, Ministarstvo sigurnosti, Državna agencija za istrage i zaštitu broj:I-16-14/1-04-1-748-15/13 od 24.01.2020.godine, T 23. - Zapisnik o ispitivanju osumnjičenog Emira Ališića, Tužilaštvo BiH broj: T20 0 KTT 0011872 16 od 27.12.2019. godine, T 24. - Izvještaj o počinjenom krivičnom djelu i izvršitelju, Ministarstvo sigurnosti, Državna agencija za istrage i zaštitu broj: I-16-14/1-04-1-748-1091/13 od 29.02.2016. godine, T 25. - Dopuna izvještaja o počinjenom krivičnom djelu, Ministarstvo sigurnosti, Državna agencija za istrage i zaštitu broj:I-16-14/1-04-1-748-2766/13 od 29.08.2019. godine, T 26. - Zapisnik o ispitivanju osumnjičenog Emira Ališića, Tužilaštvo BiH broj: T20 0 KTT 0011872 16 od 15.05.2020. godine, T 27. - Zapisnik o prepoznavanju osoba broj 16-04/1-SZ-29/20 od dana 03.03.2020.godine, T 28. - Nalaz i mišljenje prof.dr Alme Alajbegović za Sadžidu Dedić,

Aminu Kečo, Aidu Kobić i Medinu Delić od 14.10.2020. godine, T 29. - Molba za pružanje međunarodne pravne pomoći u krivičnim stvarima broj T20 0 KTT 0010462 15, T20 0 KTT 0010333 15, T20 0 KTT 0011872 16, T20 0 KTT0012366 16, T20 0 KTT 0018379 19, T20 0 KTT 0017656 19, T20 0 KTT 0018378 19 od 14.01.2020. godine, T 30. - Zapisnik o saslušanju svjedoka Sadžida Dedić broj 16-16/1-56/19 od 20.12.2019.godine skupa sa Zapisnik o saslušanju svjedoka Sadžida Dedić broj 16-04/1-32/19 od 22.12.2019.godine, T 31. - Zapisnik o saslušanju svjedoka Emina Kečo broj 16-04/1-26/19 od 20.12.2019.godine skupa sa Zapisnik o saslušanju svjedoka Emina Kečo broj 16-04/1-29/19 od 21.12.2019.godine, T 32. - Zapisnik o saslušanju svjedoka Aida Kobić broj 16-04/1-31/19 od 22.12.2019.godine skupa sa Zapisnik o saslušanju svjedoka Aida Kobić broj 16-16/1-62/19 od 23.12.2019.godine, T 33. - Fotoalbum državljana BiH koji su boravili ili još uvijek borave na području Sirije, T 34. - Zapisnik o saslušanju svjedoka Medina Delić broj 16-04/1-30/19 od 21.12.2019.godine skupa sa Zapisnikom o saslušanju svjedoka broj 16-04/1-25/19 od 20.12.2019.godine, T 35.- Odgovor na Zamolnicu-Akt Ministarstva Pravde BiH broj 08-14-5-177/20 od 02.11.2020.godinesa prilogom Akt Ministarstva pravde SAD broj CRM-182-72026 od 23.10.2020.godine.

Pri navedenom, Sud je naročito imao u vidu da su gotovo svi svjedoci optužbe potvrdili da je optuženi boravio u Siriji u inkriminiranom periodu, pri čemu je svjedok S2, koji se i sam nalazio u Siriji u inkriminirano vrijeme, dodatno pojasnio ulogu optuženog, okolnosti i situacije u kojima ga je viđao, kao i da su on i optuženi zajedno držali straže u Siriji pri tome štiteći ISIL. Dodatno, svjedoci Vlado Azinović i Mario Janiček su pojasnili prirodu, ciljeve, ulogu i strukturu ISIL-a kao terorističke vojne organizacije.

### **Organizovanje terorističke grupe (Član 202d)**

(1) Ko organizuje terorističku grupu ili na drugi način udružuje najmanje tri lica radi izvršenja nekog od krivičnih djela iz člana: 191. (*Uzimanje talaca*), 192. (*Ugrožavanje lica pod međunarodnom pravnom zaštitom*), 194. (*Neovlašćeno pribavljanje ili raspolaganje nuklearnim materijalom*), 194a. (*Ugrožavanje nuklearnog objekta*), 196. (*Piratstvo*), 197. (*Otmica aviona ili broda ili zauzimanje fiksne platforme*), 198. (*Ugrožavanje bezbjednosti vazdušne ili morske plovidbe ili fiksni platformi*), 199. (*Uništenje i uklanjanje znakova koji služe bezbjednosti vazdušnog saobraćaja*), 200. (*Zloupotreba telekomunikacionih znakova*), 201. (*Terorizam*), 202. (*Finansiranje terorističkih aktivnosti*), 202a (*Javno podsticanje na terorističke aktivnosti*), 202b. (*Vrbovanje radi terorističkih aktivnosti*) ili 202c. (*Obuka za izvođenje terorističkih aktivnosti*), kazniće se kaznom zatvora najmanje pet godina.

(2) *Ko postane pripadnik grupe iz stava (1) ovog člana ili na bilo koji drugi način učestvuje u aktivnostima terorističke grupe, uključujući pružanje finansijske i bilo koje druge pomoći, kazniće se kaznom zatvora najmanje tri godine.*

Prilikom odlučivanja o krivičnopravnoj sankciji, Sud je shodno članu 48. KZ BiH imao u vidu zakonski okvir kažnjavanja za krivično djelo Organiziranje terorističke grupe iz člana 202d. stav 2. u vezi sa stavom 1. Krivičnog zakona Bosne i Hercegovine (KZ BiH), a sve u vezi sa krivičnim djelom Terorizam iz člana 201. KZ BiH, ali i sve okolnosti koje mogu biti od uticaja da kazna bude veća ili manja, a naročito stepen krivice optuženog, pobude iz kojih je djelo učinjeno, jačinu ugrožavanja zaštićenog dobra, okolnosti pod kojima je djelo

učinjeno, kao i lične i porodične prilike optuženog i druge okolnosti. Kao olakšavajuće, Sud je cijenio okolnosti da je optuženi priznao izvršenje krivičnog djela i izrazio iskreno kajanje, da je priznanjem krivice i zaključivanjem sporazuma doprinio bržem i efikasnijem okončanju predmetnog krivičnog postupka, te je time ispoštovano i načelo ekonomičnosti, ali ne na štetu pravilnosti i zakonitosti odluke, da je porodičan čovjek. Sud je imao u vidu i njegovu iskazanu spremnost na saradnju sa nadležnim organima. Otežavajuće okolnosti Sud nije našao. Sud nalazi da navedene olakšavajuće okolnosti u njihovoj ukupnosti predstavljaju osobito olakšavajuće okolnosti koje ukazuju da se i sa ublaženom kaznom zatvora može postići svrha kažnjavanja, pa je optuženom izvršio ublažavanje kazne primjenom odredaba člana 49. i 50. stav 1. tačka b) KZ BiH i utvrdio kaznu zatvora ispod posebnog minimuma propisane kazne za ovo krivično djelo, tako što mu je utvrdio kaznu zatvora u trajanju od 2 (dvije) godine i 6 (šest) mjeseci, nalazeći da će sa ovako utvrđenom kaznom postići svrha kažnjavanja predviđena članom 39. KZ BiH, a da je njena visina u srazmjeri sa osobito olakšavajućim i otežavajućim okolnostima koje su navedene.

Na osnovu odredbe člana 56. KZ BiH, optuženom će se u izrečenu kaznu zatvora uračunati vrijeme koje je proveo u pritvoru, počev od 19.12.2019. godine, pa nadalje.

Članom 188. stav 1. ZKP BiH je propisano da će Sud, kada optuženog oglasi krivim, a što je situacija u konkretnom slučaju, u presudi izreći da je dužan da naknadi troškove krivičnog postupka. Sud je u skladu sa navedenom zakonskom odredbom, optuženog obavezao da naknadi troškove krivičnog postupka, a na šta se obavezao i optuženi zaključivanjem predmetnog sporazuma (stav VI sporazuma). S obzirom da Sud u momentu donošenja presude nije raspolagao sa tačnim podacima o visini tih troškova, odluka o visini troškova će se donijeti naknadno, po pribavljanju potrebnih podataka, a kako to i propisuje odredba člana 186. stav 2. ZKP BiH.

**ZAPISNIČAR**

**Pravni savjetnik  
Sanida Vahida-Ramić**

**PREDSJEDNIK VIJEĆA  
SUDIJA**

**Biljana Ćuković**

**POUKA O PRAVNOM LIJEKU:** Žalba na izrečenu krivičnopravnu sankciju nije dozvoljena, dok se presuda iz drugih razloga može pobijati žalbom u roku od 15 dana od dana prijema iste.

